

Parlamentario René Herdé di AVP

Fase dos di e renobacion di Yuwana Morto Complex ta casi cla

ORANJESTAD - Un di e areanan cu mas gobierno di AVP a pone atencion na dje ta e renobacion fisico y social di barionan rond di Aruba. E prome bario cu a wordo renoba ta e bario di Yuwana Morto Complex na San Nicolas. E proyecto di renobacion fisico di e cas y cayanan, facilidadnan manera luznan di caya y espacio habri pa habitantenan bini hunto pa nan actividadnan di bario, a bira e ehempel pa otro barionan. E prome fase a keda cla net prome cu bishita di Su Mahestad Reina

Beatrix. Awor e di dos fase di 24 cas, cayanan cu luz, luganan pa pone auto y espacio pa recrea, ta kedando cla. Cu casi tur cas renoba, e beyesa di e bario y di e renobacion fisico ta bira mas cla. E renobacion social tambe ta sigui. Siman pasa e organisacion di bario "Fundacion Vision Nobo Yuwana Morto Complex, a organisa un tremendo torneo di domino y tabata tin diferente team di nan propio bario, banda di teamnan di otro bario. E torneo aki a bay asina bon, cu ta planea pa rip-

iti esaki pa fin di april. (Dia di Rey y Dia di trahado.) Na mas cu un ocasion e habitantenan di e bario a wordo invita pa conta con nan bario a cambia y tur siman tin gruponan di hende di otro bario y di pafo di Aruba ta bishita Yuwana Morto Complex pa wak e bario renoba y rebiba, cu nan propio wowo. Un habitante a conta den fin di siman pasa cu "hopi hende a kere cu e proyecto aki nunca lo por a bira realidad. Hopi hende a kere cu a traha e prome parti djis pa bishita di La Reina aña pasa. Pero awor tur hende ta wak cu e renobacion completo ta un realidad. AVP a cumpli."

WAK PA BO KERE

Un di e hendenan cu a sostene e renobacion di e barionan, hopi prome cu a pone e prome piedra, ta René Herdé'. E no tabata tin niun duda cu e proyecto aki lo a wordo realisa una bes cu AVP drenta gobierno. René Herdé': "For di den oposicion nos a enfatisa e importancia di crea



barionan cu ta bon pa biba aden. Scolnan cu ta duna Bogana di bay scol. Cayanan cu acera y luz cu ta duna mas seguridad y ta invita pa cana den bario y bishita bisñanan. E tarea di gobierno ta pa crea e miho condicionnan posibel pa hende por biba, traha, studia y diberti.

E renobacion di nos barionan, manera esun di Yuwana Morto Complex, ta un punto masha importante den e maneho di mehora bida pa tur hende na Aruba. Na comienso en berdad hende a kere cu loke nos tabata bisa tabata djis pa

campana politico. Awor tur hende por wak pa nan mes y kere loke nos a bisa cu nos a ta bay haci! Y no akinan so. Wak e proyectonan di renobacion na Pos Chikito, Brazil, Madiki y awor tambe Sero Patrishi. Y nos ta bay sigui cu e renobacion di tur bario riba henter nos isla den e siguiente cuatro aña. No solamente pasobra tur hende kier pa renoba nan bario. Pero pasobra tur hende merece di biba den un bario bunita asina." Riba e combinacion di foto por tira un bista riba Yuwana Morto Complex

